

Memorandwm Cyd-ddealltwriaeth rhwng y Swyddfa Cofnodion Cyhoeddus a Chynulliad Cenedlaethol Cymru

Rhagarweiniad

1. Mae'r Memorandwm hwn yn nodi'r gyd-ddealltwriaeth rhwng y Swyddfa Cofnodion Cyhoeddus (PRO) a Gweinyddiaeth y Cynulliad (a ddiffinnir fel staff Cynulliad Cenedlaethol Cymru ac y cyfeirir ati yma wedi hyn fel y Cynulliad). Datganiad o fwriad yw'r Memorandwm, ac ni ddylid ei ddehongli fel cytundeb neu gontract rhwymol. Nid yw'n creu hawliau, rhwymedigaethau neu gyfyngiadau cyfreithiol rhwng y partion. Bwriedir iddo rwympo o ran anrhydedd yn unig. Nid yw'n creu unrhyw hawliau ynglyn ag ymgynghori na hawliau i atal ymgynghori y tu hwnt i'r hyn sy'n ofynnol yn ôl statudau.
2. Bwriad y Memorandwm yw hybu cydweithredu a chyfathrebu adeiladol. Mae'n nodi fframwaith ar gyfer gwaith gan y swyddogion i barhau i feithrin perthnasoedd rhwng y ddau barti o'i fewn. Y prif nod yw sicrhau y bydd y naill yn rhoi digon o rybudd ymlaen llaw os yw'n bwriadu cymryd camau sy'n effeithio ar gyfrifoldebau'r llall.
3. Y brif sianel ar gyfer cyfathrebu ar bob mater ynglyn â chofnodion cyhoeddus Cymru fydd honno rhwng Rheolwr Cleient (CM) y Swyddfa Cofnodion Cyhoeddus sy'n gyfrifol am y Cynulliad a Swyddog Cofnodion Adrannol (DRO) y Cynulliad. Yn ysgrifenedig y dylid ymgynghori yn ffurfiol fel arfer, gan gydategu hynny yn rheolaidd drwy gysylltiadau anffurfiol rheolaidd lle bynnag y bo modd. Ym mhob achos sy'n ymwneud â chofnodion cyhoeddus Cymru lle defnyddir sianeli cyfathrebu eraill, dylid rhoi gwybodaeth gyflawn i'r CM a'r DRO fel rhan o'r drefn.

Y Fframwaith Cyfreithiol

4. Mae Deddf Llywodraeth Cymru 1998:

- yn nodi categori newydd o gofnodion cyhoeddus i'w galw'n gofnodion cyhoeddus Cymru. Rhestrir y cofnodion sy'n perthyn i'r categori hwn yn adran 118 o Ddeddf Llywodraeth Cymru, ac maent yn cynnwys cofnodion y Cynulliad a chofnodion a oedd gynt yn cael eu trosglwyddo i'r Swyddfa Cofnodion Cyhoeddus;
- yn galluogi Cynulliad Cenedlaethol Cymru, os yw'n dymuno, i wneud trefniadau addas ar gyfer dethol cofnodion cyhoeddus Cymru a gwneud trefniadau ar gyfer eu storio yn y tymor hir a threfniadau i'r cyhoedd gael eu gweld. Caiff y trefniadau hyn eu hasesu gan swyddogion o'r Swyddfa Cofnodion Cyhoeddus yn unol â'r safonau sy'n gymwys ar gyfer cofnodion y DU. Pan fydd yr Arglwydd Ganghellor wedi cymeradwyo'r trefniadau hyn, bydd yn gwneud Gorchymyn yn trosglwyddo'r cyfrifoldeb llawn dros gofnodion cyhoeddus Cymru i Gynulliad Cenedlaethol Cymru.
- yn ei gwneud yn ofynnol i Geidwad y Cofnodion Cyhoeddus, ar ran yr Arglwydd Ganghellor, oruchwylio'r trefniadau cyfredol ar gyfer cofnodion cyhoeddus Cymru nes bod Gorchymyn o'r fath yn cael ei wneud.

5. Bydd y Memorandwm hwn yn aros mewn grym tra bydd y trefniadau presennol ar gyfer ymdrin â chofnodion cyhoeddus Cymru yn bodoli. Os ceir unrhyw newid, daw'r Memorandwm i ben a deuir ag un newydd i rym.

Y cydadwaith rhwng Cyfrifoldebau'r Swyddfa Cofnodion Cyhoeddus a Chyfrifoldebau'r Cynulliad

6. Credir bod cyfathrebu da yn bwysig ac felly fe fydd y ddau barti:

- yn ceisio cynnwys ei gilydd, fel y bo'n briodol a phan fo'n briodol, wrth lunio polisiau;
- yn rhoi gwybod i'w gilydd am ddatblygiadau sy'n effeithio ar bob maes o reoli cofnodion;

- yn rhoi ystyriaeth briodol i farn y llall a lle bo modd yn caniatáu graddfa amser resymol ar gyfer rhoi ystyriaeth briodol i sylwadau a gwybodaeth;
- yn rhoi gwybod i'w gilydd am unrhyw wybodaeth berthnasol y gall fod angen gweithredu yn ei chylch neu a all greu goblygiadau ar gyfer adnoddau y parti arall;
- yn rhoi rhybudd ymlaen llaw, cyn gynted ag y bo'n ymarferol, am gyhoeddiadau polisi newydd o sylwedd;
- yn rhannu gwybodaeth, dadansoddiadau ac ymchwil, lle byddai trefniadau o'r fath o les i'r ddau.

7. Bydd y Swyddfa Cofnodion Cyhoeddus:

- yn rhoi canllawiau ac yn darparu safonau y cytunir arnynt ar gyfer y meysydd bras canlynol:
 - rheoli cofnodion byw;
 - storio cofnodion;
 - gwerthuso cofnodion;
 - paratoi cofnodion dethol i'w throsglwyddo i'r Swyddfa Cofnodion Cyhoeddus neu i fan adnau arall ar gyfer cofnodion cyhoeddus a gymeradwywyd o dan adran 4(1) o Ddeddf Cofnodion Cyhoeddus 1958;
 - pob agwedd ar reoli cofnodion a dogfennau electronig;
 - y cyfle i'r cyhoedd gael gweld cofnodion cyhoeddus Cymru.
- Caiff canllawiau a chymorth eu darparu drwy gyfrwng:
 - ymweliadau rheolaidd gan y Rheolwr Cleientau a staff eraill yn ôl yr angen;
 - rhoi cyngor penodol ar ffurf ysgrifenedig neu electronig neu dros y ffôn;
 - cynhyrchu canllawiau a safonau cyhoeddedig;
 - ategu rhaglen o seminarau hyfforddi, a fydd yn arwain at gymhwyster a gymeradwyir;
 - darparu gwasanaeth ymgynghoriaeth rheoli cofnodion, y codir tâl amdano;
 - darparu cynhadledd flynyddol a seminarau a chyfarfodydd eraill yn ôl yr angen.

8. Bydd y Cynulliad:

- yn cyflawni'r swyddogaethau a restrir isod yn unol â'r safonau a gynhyrchir gan y Swyddfa Cofnodion Cyhoeddus:
 - ymgynghori â'r Swyddfa Cofnodion Cyhoeddus yn ôl yr angen, ond yn benodol ym meysydd rheoli'r holl gofnodion cyfredol gan gynnwys cofnodion electronig;
 - gwerthuso, paratoi a throsglwyddo cofnodion dethol i'r Swyddfa Cofnodion Cyhoeddus yn rheolaidd ac yn brydlon;
 - sicrhau bod yr holl staff sy'n gweithio yn yr amgylchedd cofnodion wedi'u hyfforddi i safon briodol;
 - creu, trefnu a storio'r holl gofnodion mewn ffordd a fydd yn sicrhau eu bod yn goroesi ac yn gallu cael eu hadfer;
 - trefnu bod set o gofnodion trafodion y Cynulliad Cenedlaethol, gan gynnwys ei bwyllgorau, yn cael ei chadw i'w throsglwyddo yn y dyfodol i'r Swyddfa Cofnodion Cyhoeddus neu i fan adnau a ddynodir gan yr Arglwydd Ganghellor.

Y Berthynas â Swyddfa Ysgrifennydd Gwladol Cymru

9. Mae trefniadau arbennig wedi'u sefydlu mewn perthynas â sut i drin cofnodion sy'n perthyn i Swyddfa Ysgrifennydd Gwladol Cymru (OSSW) o dan delerau Cytundeb Lefel Gwasanaeth a luniwyd rhwng OSSW a'r Cynulliad. Mae'r trefniadau hynny'n ymdrin â meysydd fel storio, mynediad, adfer, adolygu, dinistrio, cadw a chyngor a chanllawiau.

Cyrff Cofnodion Cyhoeddus Cymru (gweler y rhestr yn Atodiad A)

10. Y trefniant ar hyn o bryd yw bod cyrff cofnodion cyhoeddus Cymru, gan gynnwys OSSW, wedi penodi eu DRO eu hunain ac yn ymdrin yn uniongyrchol â'r Swyddfa Cofnodion Cyhoeddus. Dylai hyn barhau.

11. Y Cynulliad sy'n gyfrifol am ariannu'r mwyafrif o'r cyrff hyn. Gan gydgyssylltu â'r Swyddfa Cofnodion Cyhoeddus, dylai DRO y Cynulliad gadw llygad ar y cyrff hyn. Os daw unrhyw broblemau yn hysbys i'r Cynulliad, bydd yn gwneud ei orau glas, unwaith eto gan gydgyssylltu â'r Swyddfa Cofnodion Cyhoeddus, i gael y corff o dan sylw i gymryd camau adfer.

12. Dylai'r Cynulliad sicrhau bod ystyriaeth briodol yn cael ei rhoi, pan fydd unrhyw gorff newydd sydd i'w noddi yn cael ei sefydlu, i sicrhau bod gan gofnodion cyrff o'r fath statws cofnodion cyhoeddus Cymru.

13. Dylai'r Cynulliad ystyried hefyd a ddylai statws cofnodion unrhyw un o'r cyrff sy'n cael eu noddi ar hyn o bryd ac nad oes ganddynt statws fel cofnodion cyhoeddus Cymru, gael ei newid, ac os felly, trefnu bod newidiadau o'r fath yn cael eu gwneud.

Swyddfa Cofnodion Cyhoeddus i Gymru

14. Mae adran 117 o Ddeddf Llywodraeth Cymru yn rhoi pŵer i'r Arglwydd Ganghellor nodi o dan Orchymyn sut y dylai'r Cynulliad ymdrin â chofnodion cyhoeddus Cymru, gan gynnwys creu Swyddfa Cofnodion Cyhoeddus i Gymru. Bydd angen i unrhyw gais gan y Cynulliad i Orchymyn o'r fath gael ei wneud fodloni'r Arglwydd Ganghellor fod y Cynulliad yn gallu cyrraedd y safonau sy'n gymwys ar gyfer cofnodion cyhoeddus y DU. Os bydd Cynulliad Cenedlaethol Cymru'n penderfynu datblygu opsiynau ar gyfer Swyddfa Cofnodion Cyhoeddus i Gymru, yna bydd y Cynulliad yn hysbysu Pennaeth Archwilio Archifau'r Swyddfa Cofnodion Cyhoeddus cyn gynted ag y bo'n ymarferol.

15. O dan amgylchiadau felly, bydd y Swyddfa Cofnodion Cyhoeddus:

- yn rhoi cyngor prydlon ar y tebygrwydd y bydd cynnig penodol yn bodloni'r safonau ar gyfer cadwraeth a mynediad sy'n gymwys i gofnodion cyhoeddus a gynhwysir o dan Ddeddfau Cofnodion Cyhoeddus 1958 a 1967;
- yn hysbysu'r Cynulliad ymlaen llaw am unrhyw newidiadau o bwys a wneir i'r safonau hynny.

Cyfeiriadau a Llofnodion

16. Anfonir pob gohebiaeth ynghylch telerau ac amodau'r Memorandwm hwn yn ysgrifenedig i'r cyfeiriadau canlynol:

Cynulliad Cenedlaethol Cymru

Adeiladau Newydd y Goron

Parc Cathays

Caerdydd

CF1 3NQ

Y Swyddfa Cofnodion Cyhoeddus

Kew

Richmond

Surrey

TW9 4DU

Llofnodwyd ar ran Cynulliad Cenedlaethol Cymru

Brian Mitchell..... Dyddiad:....*24th August 2000*....

Llofnodwyd ar ran y Swyddfa Cofnodion Cyhoeddus

Sarah Tyacke..... Dyddiad.....*30th August 2000*....

Atodiad A

Cyrff a noddir ac y bernir bod eu cofnodion yn perthyn i gofnodion cyhoeddus Cymru fel yr ymdrinnir â hwy o dan adran 118 o Ddeddf Llywodraeth Cymru 1998

- a. Cyngor Cefn Gwlad Cymru

- b. Pwyllgorau Ymarferwyr Teulu ar gyfer Ardaloedd yng Nghymru
- c. Estyn
- d. Cyngor Cyllido Addysg Bellach Cymru
- e. Cyngor Addysgu Cyffredinol Cymru
- f. Ysbytai'r gwasanaeth iechyd, o fewn ystyr Deddf y Gwasanaeth Iechyd Gwladol 1977, yng Nghymru
- g. Cyngor Cyllido Addysg Uwch Cymru
- h. Comisiwn Ffiniau Llywodraeth Leol Cymru
- i. Awdurdodau'r Gwasanaeth Iechyd Gwladol ar gyfer dosbarthau neu ardaloedd yng Nghymru neu ar gyfer Cymru neu ardaloedd ynddi, gan gynnwys ymddiriedolaethau'r Gwasanaeth Iechyd Gwladol y mae eu hysbytai, eu sefydliadau a'u cyfleusterau i gyd wedi'u lleoli yng Nghymru
- j. Awdurdod Cymwysterau, Cwricwlwm ac Asesu Cymru; a'i ragflaenwyr
- k. Comisiwn Brenhinol Henebion Cymru
- l. Bwrdd Iechyd Cymru
- m. Archwilydd Cyffredinol Cymru

Mae'r rhestr hon yn gyflawn ar 1 Medi 2000.